



Il mas-chalch da Sent

Publicaziuns officialas. Cumpara seguond bsögn.
2001/2002
no. 27

7554 Sent, 27 november 2002 /rz

Radunanza cumünala

La radunanza es gnüda fixada sün **marcurdi, 4 december 2002** a las 20.15 in chasa cumünala.

Tractandas:

1. Credit brutto da fr. 157'000.-- (netto fr. 97'000.--) per la 4. etapa da lavur (sarinera Sot Ruinas)
2. Protocol da la radunanza cumünala dals 21 november 2002
3. Vendita da bains e terrains ad esters
4. Fixar il pè d'imposta pel 2003
5. Preventiv cumünal pel 2003
6. Preventiv d'investiziuns pel 2003
7. Varia

Il Cussagl cumünal giavüscha cha tuot ils interessents passan a partir da gövgia, 28 november 2002 pro l'administraziun cumünala per la documainta per la tractanda 5 e 6 per na perder massa bler temp pro la preschantaziun dals preventivs d'urant la radunanza.

Il Cussagl cumünal

GA-Flexicard – sporta da bigliets favuraivels

Per promover il trafic public, dà il Cumün a nossa populaziun la pussibilità da cumprar bigliets favuraivels, culs quals i's po viagià in tuot la Svizra cul tren, posta, barcha, tram e bus ün di a la lunga. Il bigliet es datà e vaglia be per quel di. **Per mincha di es avantman be ün bigliet.**

Interessents pon a partir da subit, ed uschigliö plü bod pussibel, **reservar** il bigliet pro'l büro cumünal, **tel. 081 / 861 20 60.**

Quista sporta vala eir per l'on
Predsch dal bigliet:

2003
fr. 28.—

Il Cussagl cumünal/Chascha cumünala

Advent pels attempats

Eir quist on organischescha la società da duonnas ün davomezdi d'Advent per quellas persunas da las annadas 1932 e plü veglias (da 70 amunt). La data es gnüda fixada sün **dumengia, 15 december 2002**, a las 14.00 illa chasa Misoch.

I'ns fess grond plaschair scha tuot quellas persunas gnissan a nossa marena.

Annunzchas piglia incunter Felicia Salomon, tel. 081/864 03 58, fin il plü tard als **10 december 2002.**

La società da duonnas

Nouv sistem da passaport e da la carta d'identità svizra

A partir dals 1.1.2003 vain in vigur il nouv sistem dal passaport e da la carta d'identità svizra!

Quia dain nus cuntshaint las müdadas las plü importantas:

- I nun es plü pussibel da prolungar ün passaport o üna carta d'identità.
- Per laschar far ün passaport o üna carta d'identità nouva, esa da far quint cun 15 dis da lavur, q.v.d. 3 eivnas! Sch'inchün douvra plü bod, sto'l laschar far ün passaport provisor, per üna dürada da max. 1 on!
- Minchün es oblià da gnir persunalmaing pro la controlla d'abitants per laschar far ün passaport o üna carta d'identità. Pro uffants majorens sto esser preschaint eir ün dals genituors, per suottascriver.
- La fotografia sto avair üna buna qualità, po esser in alb e nair o da culur. (Fotografia da pass!)
- Il cuosts chantunals:

- passaport per creschüts, a partir da 18 ons	fr. 120.00
- carta d'identità per creschüts, a partir da 18 ons	fr. 65.00
- passaport e carta d'identità insembel per creschüts	fr. 128.00
- passaport per uffants, suot 18 ons	fr. 55.00
- carta d'identità per uffants, suot 18 ons	fr. 30.00
- passaport e carta d'identità insembel per uffants	fr. 63.00
- passaport provisor per creschüts ed uffants	fr. 100.00
- Pro mincha documaint vain in chaschada üna taxa cumünala da fr. 10.00

Nus giavüschain a la populaziun da tour cogniziun da quists müdamaints. Per dumondas sta la controlla d'abitants gugent a Vossa disposiziun.

Controlla d'abitants

Gronda sairada da lotto

In **sonda, 21 december 2002 a las 20.00** ha lö in chasa da scoula üna gronda sairada da lotto cun fich bels premis e cun ustaria. La prüma runda es gratuita. Amiaivelmaing invida

La grappa da corns Tardanna Sent

Traversada da Sent 2003

La Traversada 2003 vain manada tras **sonda, 5 lügl 2003**. Reservai fingià hoz quella data. No sperain sün gronda partecipaziun.

Pels organisaturs: Georg Buchli

Da dar a fit

a Sent, a partir da subit o tenor cunvegna ün'abitaziun da 3 stanzas in Curtin. Annunzchas piglia gugent incunter: Robert Demonti, tel.: 079/755 01 53.

Chant avert d'Advent

Chi chi vess dalet da chantar chanzuns d'Advent intuorn cumün es bainviss als 18 december 2002 a las 20:00 in sala cumünala per üna prouva. Als 22 december 2002 chantessna intuorn cumün. L'urari vain decis quella saira.

No sperain sün üna gronda partecipaziun e giavüschain a tuots ün bel temp d'Advent.

Erica Clalüna e Leta Mosca

Avis

Causa chi vain insembel üna pruna comunicaziuns per la fin d'on, segua amo ün Mas-chalch als 20 december 2002. Termin da redacziun: 18 december 2002.

Administraziun cumünala

Avis a reg. rumir naiv da/per privats

Illa sezzüda dals 4 december 1996 ha discus il Cussagl cumünal a regard tscherchar üna soluziun pel möd da rumir la naiv per privats. In vista cha quista fatschenda nun es daltuot simpla a regard trar tscherts cunfins, ha decis il Cussagl cumünal da metter quist avis aint il Mas-chalch:

1. Id es admiss da rumir plazzas privatas sün vias cumünalas, scha la naiv vain palada sün via avant, il plü tard al mumaint, cha quella vain rumida dal cumün;
2. Sch'inchün giavüscha ch'ün toc terrain privat vegna rumi dal cumün, es quai dalsgüra pussibel cunter pajamaint. Annunzchar p.pl. in büro cumünal opür directamaing al schef da strada;
3. In nun es admiss, davo cha'l Cumün ha rumi las vias, da rumir naiv da terrain privat sün vias cumünalas. A quel chi surpassa quista decisiun dal Cussagl cumünal vaina miss in quint la lavur per rumir la via cumünala danouv.

Tuot ils ogets (vaschs, chaistas da fluors, bancs e.o.p.) chi sun miss davant las chasas ston gnir allontanats sur inviern, per evitar dons in connex culla rumida da naiv.

Il Cussagl cumünal